

四明叢書

張宗祥



瞻衮堂集

四明張氏約園開雕

序

先生諱鈞字陶軒吾鄞西門袁氏也鄞有三袁鑒橋袁氏有絜齋蒙齋二先生以風節著南袁有清容先生以奧學雄文爲世所宗西袁則天與先生諱鏞者抗元騎於資教寺以身死國其家人赴水死者十七人少子澤民甫六歲以僕護持得免事詳先生所著啓孤廟記而先生其裔也先生幼穎悟父諱德達在燕九歲以詩寄之曰遠思不能寐默坐觀書簡書中有所得如父親指示指示若眼前關河隔數干安能雙飛翼飛飛到日邊

秀水鄭虎文贊善稱賞不絕口明年父卒貧無以斂同年生相與經紀歸其喪先生既傷孤苦益委身於學其後虎文主講新安先生往執經其門學乃大進居萬山中師友外無妄交一日夢遊薛琉璃醒卻憶之兀若有失因繪夢遊薛琉璃圖爲文以記鄞藝文志著錄薛琉璃居詩文蓋先生以是名其居也然壽鏞欲求之未得而得瞻衮堂文集瞻衮堂在鄞城西永樂八年姚少師廣孝記云太常寺丞袁先生之所建永樂十九年胡祭酒儼記云前太常丞贈少卿袁公旣老得致仕乃名所

居之堂曰瞻衮其子尙寶少卿忠徹請余記然先生嘗
攷之宋丞相魏杞贈提刑公詩有莫忘瞻衮話平生之
句註以爲堂名則瞻衮之名謂昉於太常尙寶者非也
父老相傳爲宗正故第宗正則西袁氏遷鄞之始祖云
其事亦詳於先生所著重建瞻衮堂記先生遺著其大
者爲鄭氏佚書二十三種壽鏞雖不能盡讀而讀其所
自序者辨析譌謬補正缺失齊其不齊以次收合洵爲
漢學之功臣不僅高密之嫡系矣浙書局已刊之又如
四明文徵刪繁就簡網羅舊聞有裨掌故壽鏞得之於

伏跗室今甫付刊又如四明近體樂府彙作者百六十人閒及無名氏附以詞話詞人更賴以傳鄭氏二老閣亦刻之其未刻而藏於其後裔者尙夥也萬季野曰無益之文不作先生之作其小者繫於一族其次繫於一鄉其大者繫於天下萬世自暴秦焚劫詩書義晦綜貫繩合厥維康成洎王肅僞作古書駁難鄭義而遺文幾幾歇絕先生生於百世而後獨能抱殘守闕甄采靡遺則有功於漢也近世學者厭薄朱子務以一名一物爭勝先生則謂朱子鎔鑄羣言獨標精義於是參考眾說

爲詩經朱傳翼二十卷朱傳補義一卷讀詩偶記十二
卷則有功於宋也其留意四明掌故日攜小囊出有所
得卽投囊中夜則鐙下錄之數十年如一日於是更有
四明書畫記四明獻徵諸書而詩彙百卷搜採尤博足
補四明雅集及甬上耆舊集所未備則有功於鄉者也
吾鄉多文學士學與文兼羣推先生阮芸臺不輕許人
者謂吾鄞季野之後足與頡頏蓋其信之有素焉耳竊
因之有感矣先生十歲而孤淒涼旅舍與先君子十一
歲而孤者情景相若其後先君子沒於燕邸又與先生

之父永北公相類壽鏞行能無似不得如鄭贊善者爲之陶淑然三十三年前居潁州不營新安之萬山中萬物靜觀而皆自得又若夢遊薛琉璃矣今冉冉將老學無所成惟覺夢寐皆有鄉先生著述陳前而日在故紙求生活讀先生書益想見其人而爲之低徊不置斯集初刊爲其曾孫可煥今板已燬因重刊之而爲之序且願後之人盡傳其書焉民國二十五年二月後學張壽鏞

序

四世伯祖袁陶軒先生著書四十種其已刊者曰四明
近體樂府十四卷曰鄭氏佚書二十三種總七十九卷
近體樂府嘉慶間慈谿二老閣鄭氏刻以行世經粵寇
之亂蕩爲灰燼鄭氏佚書先生之曾孫可煥開雕於光
緒十年以艱於資斧刻四種而輟時善化瞿協揆視學
浙江檄書局踵刊始得告成瞻衮堂文集十卷可煥暨
其從弟可羣恐日久散佚不得已貶損衣食先付削氏
以存梗概刻竟以示族弟堯年乃僭書其首曰聖清受

命文治光昭康雍乾嘉之間鉅儒碩彥比肩接迹顧遂
於學問者不必能文章長於文章者不必深學問卽以
吾郡言之學問如萬季野全謝山貫穿羣籍實事求是
而於文則疏文章如姜湛園登峰造極一時無兩而於
學則疏儒林文苑歧而爲二自後漢以來未之或改論
者有遺憾焉惟我陶軒先生湛深經術由源及委故其
爲文也澹遠簡樸秩然有序如初月如清風如幽林曲
澗紆迴不盡如碧梧翠竹芟盡枝葉高出於冬嶺之表
又如夏代之鼎商代之盤色澤俱古陳列廟堂之上令

人穆然而高望肅然而起敬求之廬陵南豐如一轍也
又上而求之昌黎柳州如一轍也嗚呼美矣蔑以加矣
所惜先生伏處幽隱聲光闇汶以諸生終老又不得一
蓄道德而能文章者爲之表揚而上諸史氏其生平撰
述未由著錄於四庫遲之又久雖吾子孫後起者恐不
能名先生爲何如人也堯年竊不自量思推闡先生之
學問文章章施無極勉爲此敘庶幾後世讀先生之集
得其大概或有大有力者出搜索全稿壽諸梨棗以竟
先生之志此則可煩兄弟所朝夕禱祝而不敢一日或

忘者已光緒三十有四年先立秋三日四世諸孫堯年

謹敘

列傳 鄆縣志

袁鈞字秉國一字陶軒號西廬德達之子幼穎悟絕人
九歲德達在京鈞作寄父詩曰遠思不能寐默坐觀書
笥書中有所得如父親指示指示若眼前關河隔數千
安能雙飛翼飛到日邊父友贊善鄭虎文見而深器
之明年德達卒宦橐蕭然適虎文歸里主講新安以書
招鈞其母命之往曰汝但成名吾不憐汝幼也遂執經
於虎文虎文教之并歲恤其家鈞亦勤於學雖嚴冬隆
暑手未嘗釋卷越五載學成歸年十九補諸生旋受知

於學使阮元拔第一元撫浙召置幕中才譽日著鈞工
詩古文詞且精康成一家之學搜其逸書二十三種編
輯之尤留意四明掌故每日攜小囊出有所得卽投囊
中夜則就燈下錄之數十年如一日著述甚富有四明
書畫記文徵獻徵近體樂府諸書而詩彙百卷搜採尤
博自漢至國朝雍乾中凡千餘人一詞一句不令遺沒
足補四明雅集及甬上耆舊集所未備會邑令錢維喬
聘修鄞志鈞以所見諸家詩文增入藝文志其他辨論
訂正者甚眾嘉慶元年詔徵直省孝廉方正有司以鈞

應授六品銜後主稽山書院卒年五十五子有容廣西
布政司經歷署西隆州同知孫眉壽字介春遂安訓導

附錄卷之三

約園刊本